

四庫全書

經部

欽定四庫全書

經部

四書大全孟子集註卷十四

詳校官給事中臣戴璐

刑部郎中臣許兆椿覆勘

覆校官中書臣田尹衡

校對官檢討臣郭寅

謄錄監生臣劉書

欽定四庫全書

孟子集註大全卷十四

盡心章句下

凡三十八章

孟子曰不仁哉梁惠王也仁者以其所愛及其所不愛  
不仁者以其所不愛及其所愛

親親而仁民仁民而愛物所謂以其所愛及其所不  
愛也

公孫丑曰何謂也梁惠王以土地之故糜爛其民而戰之大敗將復之恐不能勝故驅其所愛子弟以殉之是之謂以其所不愛及其所愛也

梁惠王以下孟子答辭也糜爛其民使之戰鬪糜爛其血肉也復扶又反之復戰也子弟謂太子申也即所謂東

敗於齊長子死焉者以土地之故及其民以民之故及其子皆

以其所不愛及其所愛也○此承前篇之末三章之

意雲峯胡氏曰承所厚者薄親親仁民仁者無不愛而言言仁人之恩自內及

外不仁之禍由疏

與疎同

逮親

南軒張氏曰仁者推其愛親者以愛人不仁者

以其忍於他人者忍於其親仁與不仁之分其端甚微而其流如此○慶源輔氏曰仁人之思自內以及外者自本而推之也惟其自本而推之故雖無所不愛而輕重等差蓋不可紊也不仁之禍由疏逮親者徇欲而從流者也惟其徇欲而從流故橫放逆施莫之紀極也始也糜爛其民人而殘賊其子弟終不至殺身覆族不已也

○孟子曰春秋無義戰彼善於此則有之矣

春秋每書諸侯戰伐之事必加譏貶以著其擅

時戰反

興之罪無有以為合於義而許之者但就中彼善於

此者則有之如召

音邵

陵之師之類是也

春秋傳公四年齊侯伐楚

楚屈完來盟于師盟于召陵○南軒張氏曰春秋無義戰如齊桓公侵蔡伐楚如晉文公城濮之戰在當時其事雖若善至於不稟王命而擅用其師則均為不義而已矣○雲峯胡氏曰春秋書戰皆以著諸侯無王之罪召陵之師猶知假尊王之義

征者上伐下也敵國不相征也

征所以正人也諸侯有罪則天子討而正之此春秋

所以無義戰也

新安陳氏曰春秋以道名分使征伐自天子出春秋不作矣惟不自天子

出而自諸侯出春秋所以作也無義戰三字斷盡春秋諸侯兵爭之罪

○孟子曰盡信書則不如無書

程子曰載事之辭容有重稱而過其實者學者當識其義而已苟執於辭則時或有害於義不如無書之愈也

吾於武成取二三策而已矣

武成周書篇名武王伐紂歸而記事之書也策竹簡也取其二三策之言其餘不可盡信也程子曰取其奉天伐暴之意反政施仁之法而已

張子曰不以文害辭不以辭害

意此教人讀詩法也於武成取  
二三策而已此教人讀書法也

仁人無敵於天下以至仁伐至不仁而何其血之流杵也

杵舂杵也或作鹵

與魯同音魯

楯也

楯豎尹反兵器所以蔽身者

武成

言武王伐紂紂之前徒倒戈攻于後以北血流漂杵

孟子言此則其不可信者然書本意乃謂商人自相

殺非謂武王殺之也孟子之設是言懼後世之惑且

長上不仁之心耳

問血流漂杵乃紂之前徒倒戈之所為荀子以為殺之者皆商人非



周人者是也而孟子不之信何哉朱子曰此亦拔本塞源之論蓋雖殺者非我而亦不忍言也程子以為孟子設為是言蓋得其微意余隱之云魯語曰俎豆之事則嘗聞之矣軍旅之事未之學也孔子之意可見矣客有問陶弘景註易與本草孰先陶曰註易誤不至殺人註本草誤則有不得其死者世以為知言唐子西嘗曰弘景知本草而未知經註本草誤其禍疾而小註六經誤其禍遲而大前世儒臣引經誤國其禍至於伏屍百萬流血千里武成曰血流漂杵武王以此自多之辭當時倒戈攻後殺傷固多非止一處豈至血流漂杵乎孟子深慮戰國之君以此藉口故曰盡信書則不如無書而謂血流漂杵未足為多豈示訓之至哉經訓之禍正此類也反以孟子為畔經豈不惑之甚邪

○孟子曰有人曰我善為陳我善為戰大罪也

陳去聲

制行

音杭

伍曰陳交兵曰戰

以帝王之世律之大罪人也

國君好仁天下無敵焉南面而征北狄怨東面而征西

夷怨曰奚為後我

好去聲

此引湯之事以明之解見

形句反

前篇

武王之伐殷也革車三百兩虎賁三千人

兩去聲賁音奔

又以武王之事明之也兩車數一車兩

如字輪也千書

序作百

王曰無畏寧爾也非敵百姓也若崩厥角稽首

書泰誓文與此小異孟子之意當云王謂商人曰無

畏我也我來伐紂本為

去聲

安寧汝非敵商之百姓也

於是商人稽首至地如角之崩也

征之為言正也各欲正己也焉用戰

馬於虔反

民為暴君所虐皆欲仁者來正己之國也

南軒張氏曰戰國之

際以功力相勝善為戰者則謂之能臣矣而孟子前以為當服上刑今又以為大罪蓋所謂深救當時之弊使之循其本也循其本有道焉其惟好仁乎好仁則無敵於天下若不志於仁而徒欲以功力取勝則天下孰非吾敵勝與負均為殘民而逆天也○雲峯胡氏曰觀此復引書而言則可知前章所謂盡信書

不如無書者矣大抵此四章亦相承而言一章以梁王之戰為不仁二章以春秋之戰為無義三章言武王仁義之師必不用我善為戰之人○東陽許氏曰孟子之時皆尚攻戰能者為賢臣而孟子乃以為大罪蓋國君苟能行仁政以愛其民使之飽暖安佚則下民親戴其上矣其他國之民受虐於君者心必歸於此人既樂歸於我我以親上之民而征虐民之君則其民豈肯與我為敵故引湯武之事以證之

○孟子曰梓匠輪輿能與人規矩不能使人巧

尹氏曰規矩法度可告者也巧則在其人雖大匠亦末如之何也已蓋下學可以言傳上達必由心悟

南軒

張氏曰聖賢之教人自洒掃應對進退而上皆規矩也行者習察則存乎人聖賢亦豈能使之然哉然而固不外乎規矩舍規矩以求巧無是理也○新安陳氏曰巧即循規矩熟後自得之妙未有舍規矩而可以得巧者上達即下學之覺悟處未有舍下學而徑可以上達者但巧與上達非教者所能致力耳未嘗以為出於規矩與下學之外也○本文如詩六義之比未嘗說破此乃以吾道之教者與學者言之也

莊周所論斲輪之意蓋如此

莊子天道篇桓公齊君讀書於堂上輪扁音篇

又如字匠氏名斲輪於堂下釋椎鑿而上問桓公曰敢問公之所讀者何言耶公曰聖人之言也曰聖人在乎公曰已死矣曰然則君之所讀者古人之糟魄者各反已夫桓公曰寡人讀書輪人安得議乎有說則可無說則死輪扁曰臣也以臣之事觀之斲輪徐則甘而不固疾則苦而不入不徐不疾得之於手而

應之於心口不能言有數存焉於其間臣不能以喻  
臣之子臣之子亦不能受之於臣是以行年七十而  
老斲輪古之人與音余其不可傳者死  
矣然則君之所讀者古人之糟粕已夫

○孟子曰舜之飯糗茹草也若將終身焉及其為天子

也被袵衣鼓琴二女果若固有之

飯上聲糗去久反茹音汝袵之忍反果說

文作裸  
烏果反

飯食也糗乾

音糗音干備

也茹亦食也袵畫

俗作畫

衣也

趙氏

曰畫黼黻絺繡之衣也

二女堯二女也果女侍也

朱子曰趙氏以果為侍廣

韻從女從果者亦曰侍

言聖人之心不以貧賤而有慕於外不

以富貴而有動於中隨遇而安無預於己所性分

去聲

定故也

南軒張氏曰若將終身若固有之可謂善形容辭者蓋所欲不存樂天而安土窮而在下

則無一毫之虧達而在上亦無一毫之加故無適而不得也○慶源輔氏曰所性謂天所予我之性分定謂雖大行不加雖窮居不損也夫貧富貴賤皆外物之儻來寄也聖人盡性故湛然無所欣戚於其間隨遇而安不以物動已也無預於己不以己隨物也

○孟子曰吾今而後知殺人親之重也殺人之父人亦殺其父殺人之兄人亦殺其兄然則非自殺之一間

耳

間去聲

言吾今而後知者必有所為

去聲

而感發也一聞者我

往彼來間一人耳其實與自害其親無異也范氏曰

知此則愛敬人之親人亦愛敬其親矣

南軒張氏曰天有顯道厥

類惟彰感應之理未有不以類者方其殺人之親孰知人殺吾親其機固已在此乎觀魏晉南北朝之君

互相屠戮自今觀之屠戮他人者實自絕滅而已矣孟子斯言欲使時君無動於念欲寡怨息爭以保其

宗廟親族是仁術也

○孟子曰古之為關也將以禦暴

譏察非常



今之為關也將以為暴

征稅出入

新安陳氏曰關有識有征古者禁異服譏異言以識為主今以征為主而已

○

范氏曰古之耕者什一後世或收大半之稅此以賦

歛

力驗反

為暴也文王之囿與民同之齊宣王之囿為

阱國中此以園囿為暴也後世為暴不止於關若使

孟子用於諸侯必行文王之政凡此之類皆不終日

而改也

南軒張氏曰古以義理為國後世徇利而已古人創法立制與天下公共凡以為民耳以

利為國雖古法之尚存者亦皆轉而為一己之計矣本原不正無往不失先王之意豈特為關之暴而已

哉○慶源輔氏曰關則一而古今所以為關之意則不同譏察非常為義也天理也征稅出入為利也人欲也天下之事莫不然孟子舉關之一事言之范氏推言及賦歛範圍之事且曰使孟子用於諸侯必行文王之政者尤說得孟子之事實蓋孟子言語句句是事實言之則必行之

○孟子曰身不行道不行於妻子使人不以道不能行於妻子

身不行道者以行

去聲

言之不行者道不行也使人不

以道者以事言之不能行者令不行也

朱子曰身若不行道則妻

子無所取法全無畏憚了然猶可使也若使人不以道則妻子亦不可使矣○問不行於妻子百事不可

行不可使亦在其中不能行於妻子却只指使人一事言之否曰然○南軒張氏曰順理之事則人易從否則雖妻子亦不能使之必從也前言不躬行則無以化之後言使之非道則不得而強之然使之以道而躬行未至彼亦未必信從均於不行而已是行道為本也然在行道者言之使人以道亦行道之見於一事者也古人謂進德者必考之於妻子其是之謂歟

○孟子曰周于利者凶年不能殺周于德者邪世不能亂

周足也言積之厚則用有餘

慶源輔氏曰德貴蓄積然後有餘用而外物不

足以亂之若夫挾一善一長而自以為足而欲以遊於邪世則鮮有不為其所亂者矣故良農不患乎年

之有凶而惟患乎蓄糧之不厚君子不患乎世之難處而患乎德之不周戰兢自持死而後已凡皆以周其德也○新安陳氏曰積利厚者豐凶皆給積德厚者理亂皆正孟子不言利而此言之主周于德而言借以為喻而引起耳

○孟子曰好名之人能讓千乘之國苟非其人簞食豆

羹見於色

好乘食皆去聲見音現

好名之人矯情干譽是以能讓千乘之國然若本非能輕富貴之人則於得失之小者反不覺其真情之發見矣蓋觀人不於其所勉而於其所忽然後可以

見其所安之實也

朱子曰讓千乘之國惟賢人能之然好名之人亦有時而能之本非

真能讓國也徒出一時之慕名而勉強為之耳這邊雖能讓千乘之國那邊草食豆羹必見於色東坡謂人能破千金之壁而不能無失聲於破釜正此意也苟非其人其人指真能讓國者非指好名之人也○常把此一段對鄉為身死而不受為義蓋此固是好人之心勝大處打得過小處漏綻也動於萬鍾者是小處遮掩得過大處發露也○千乘之國辭受之間十目所視十手所指之地也草食豆羹得失之際則微矣人亦何暇注其耳目於斯哉此好名之士所以飾情於彼以取美名而不意其鄙吝之真情實態乃發露於忽易不虞之地也○慶源輔氏曰矯情者務勉於其大而難久至誠者不忽於其小而有常是以觀人之法不於所勉而於所忽人之誠與偽見矣所安即誠也○新安陳氏曰所安對所勉言勉強者多

矯飾於大而不免發露於小安焉者則貫小大皆出於真實也

○孟子曰不信仁賢則國空虛

空虛言若無人然

慶源輔氏曰仁者德之首賢則總言其有德耳○新安陳氏曰仁賢

分言則仁仁人也賢有德之人也合言則仁德之賢人也

無禮義則上下亂

禮義所以辨上下定民志

無政事則財用不足

生之無道取之無度用之無節故也○尹氏曰三者

以仁賢為本無仁賢則禮義政事處上聲之皆不以其

道矣

南軒張氏曰信仁賢則君有所輔民有所庇社稷有所託姦宄有所憚國本植立而堅固矣有

禮義則自身以及國君君臣臣民父子而上下序所謂治也有政事則先後綱目井然具舉百姓足而君無不足焉此三者為國之大要然信仁賢其本也信仁賢而後禮義興禮義興而後政事脩雖三王之所以治亦不越是矣○新安陳氏曰禮義由賢者出為政在人三者所以以仁賢為本也何代不生賢在人君能信用之耳有之而不信用與無人同孟子不曰無仁賢而曰不信仁賢見仁賢信用之則有不信用則無此不信二字之深意

○孟子曰不仁而得國者有之矣不仁而得天下未之

有也

言不仁之人騁

丑井反

其私智可以盜千乘之國而不

可以得丘民之心

須看盜字

鄒氏曰自秦以來不仁而得

天下者有矣

秦隋五代是也

然皆一再傳而失之猶不得也

所謂得天下者必如三代而後可

南軒張氏曰不仁而得國得其土地

而已豈得其民心哉然是終可保乎孟子之言所當  
深味不可執辭以害意也後之取天下而立國差久  
者其始所行亦必庶幾於仁不然雖得土地於一時  
亂亡亦相踵而至是其得也適以速其滅亡耳○慶  
源輔氏曰不仁而得天下如曹操司馬氏及五代之  
君皆是也鄒氏斷以得天下必如三代而後可者得



孟子之旨矣○雲峯胡氏曰騁私智可以盜之於一時非至仁不可得之於悠久

○孟子曰民為貴社稷次之君為輕

社土神稷穀神建國則立壇壝

以水反又維季反

以祀之

周禮

地官大司徒設其社稷之壇而樹之田主各以其野之所宜木遂以名其社與其野○封人掌設王之社壇為畿封而樹之聚土曰封壇謂壇及壝埒也白虎通曰天子社壇方五丈取五方五色土封之諸侯半之各以其所守之方一色土封之皆冒以黃土○周禮圖社稷壇相並社壇在東稷壇在西各三級壇在四隅如矩曲方○趙氏曰社所以祭五土之神稷所以祭五穀之神稷非土無以生土非稷無以見生之效以其同功均利以養人故也蓋國以民為本社稷亦為去民而

立而君之尊又係於二者之存亡故其輕重如此

民問

貴君輕之說得不啓後世篡奪之端乎朱子曰以理言之則民貴以分言之則君貴此固兼行而不悖也各於其時視其輕重之所在而已爾若不惟其是而姑借聖賢之說則亦何詞之不可借而所以啓後人之禍者又豈止於斯乎○新安陳氏曰此以理言非以分言也

是故得乎丘民而為天子得乎天子為諸侯得乎諸侯為大夫

丘民田野之民至微賤也然得其心則天下歸之天子至尊貴也而得其心者不過為諸侯耳是民為重

也

諸侯危社稷則變置

諸侯無道將使社稷為人所滅則當更平聲立賢君是

君輕於社稷也

犧牲既成粢盛既潔祭祀以時然而旱乾水溢則變置

社稷成盛音

祭祀不失禮而土穀之神不能為去聲民禦災捍音汗患

則毀其壇壝而更平聲置之亦年不順成八蜡助駕反不

通之意

記郊特牲天子大蜡八伊耆氏始為蜡蜡也者索音色也歲十二月合聚萬物而索饗之

也蜡之祭也主先嗇而祭司嗇也祭百種以報嗇也饗農先農及郵音尤表畷陟旁反郵表畷田官督約

農事之所也禽獸仁之至義之盡也古之君子使之必報之迎貓為其食田鼠也迎虎為其食田豕也迎

而祭之也迎其神而祭之八蜡以記四方四方年不順水以其事於我而祭之

成八蜡不通不與諸方相通而祭以謹民財順成之方其蜡乃通○雲峯胡氏曰兩變置字不同集註釋

之亦異變置諸侯者改立其人也變置社稷者改立其祀神之壇墮而非改立其神也是社稷

雖重於君而輕於民也

南軒張氏曰人君惟恃崇高之勢而忽下民之微故肆其

私欲輕失人心以危其社稷使其知民之貴社稷次之而已不與焉則心兢兢業業不敢自恃惟懼其失

之也則民心得而社稷可保矣是以明王畏其民而  
闇主使民畏己畏其民者昌使民畏己者亡驕亢自  
居民雖迫於勢而憚之然其心日離民心離之是天  
命去之矣○慶源輔氏曰天生民而立之君以司牧  
之是君為民而立也世衰道微至戰國時為君者不  
知其職視民如草芥而不知恤也故孟子發此輕重  
之論而井及夫社稷焉蓋社稷亦為民立故也  
於是反覆明辨之其丁寧警切之意可謂仁矣

○孟子曰聖人百世之師也伯夷柳下惠是也故聞伯  
夷之風者頑夫廉懦夫有立志聞柳下惠之風者薄夫  
敦鄙夫寬奮乎百世之上句百世之下聞者莫不興起  
也非聖人而能若是乎而況於親炙之者乎

興起感動奮發也親炙親近而薰炙之餘見

反形句

前篇

朱子曰孟子於二子論之詳矣雖以為聖之清和然又嘗病其隘與不恭且以其道不同於孔

子而不願學也及其一旦發為此論乃以百世之師歸之而孔子反不與焉蓋孔子道大德中而無迹故學之者沒身鑽仰而不足二子志潔行高而迹著故慕之者一日感慨而有餘也○問孟子學孔子者也乃屢稱夷惠而深歎仰之何耶曰夷惠之行高矣然偏勝而易能有迹而易見且百世之貪懦鄙薄者衆一聞其風而興起焉則其為效也速而所及者廣譬之薑桂大黃之劑雖非中和然其去病之功為捷而田夫販婦大寒大暑之所使也若孔子之道則廣大而中正渾然而無迹非深於道者不能庶幾其萬一如參苓芝朮之為藥平居有養性之益而緩急伐病之功未必優於薑桂大黃非所以施於閭巷之間危

惡之侯也孟子屢稱夷惠而不及孔子其意殆以此耶○南軒張氏曰夷惠稱聖人以其聖於清聖於和而得名也○潛室陳氏曰伯夷柳下惠皆入聖來故其清為聖人之清和為聖人之和作用處與常人萬萬不侔但比孔子猶為小成之聖耳○汪氏曰聖人達則澤及當時窮則風傳後世於此不及伊尹者夷惠不為政於天下所可言者風而已伊尹異於是故不及之○雲峯胡氏曰四時之風莫和於春莫清於秋物無有不動者然在物猶有迹也仲尼元氣也渾然無迹矣

○孟子曰仁也者人也合而言之道也

仁者人之所以為人之理也然仁理也人物也以仁之理合於人之身而言之乃所謂道者也○程子曰

中庸所謂率性之謂道是也

朱子曰此仁字不是別物即是這人底道理仁

是人之道理就人身上體認出來及就人身上說合而言之便是道也○人之所以得名以其仁也言仁而不言人則不見理之所寓言人而不言仁則人不過是一塊血肉耳必合而言之方見得道理出來○如中庸仁者人也是對義者宜也意又不同人字是以人身言人自有生意脩道以仁便說仁者人也是切己言之孟子是統而言之○仁則性而已矣道則父子之親君臣之分見於人之身而尤著者也○只仁與人合而言之便是道猶言公而以人體之便是仁也

或曰外國本人之下

有義也者宜也禮也者履也智也者知也信也者實也凡二十字今按如此則理極分明然未詳其是否



也

尤延之云孟子仁也者人也下高麗本云云此說近是○新安陳氏曰若據此本則是合仁義禮智信而言之皆道也且又見得仁義禮智兼信而言五常之道尤為明備云

○孟子曰孔子之去魯曰遲遲吾行也去父母國之道也去齊接淅而行去他國之道也

重

平聲出已見萬章下篇○南軒張氏曰當其可即是道當去魯之時則遲遲其行為道當去齊之

時則接淅而行為道孟子學孔子去齊也非父母國而有三宿出晝之濡滯何也孟子於宣王蓋有望焉故其去有眷眷不能已者夫其不能以已是固道之所存也

○孟子曰君子之厄於陳蔡之間無上下之交也

君子孔子也厄與厄同君臣皆惡無所與交也

慶源輔氏

曰陳蔡之厄聖人之極否也是亦氣數之窮在聖人則何與焉

○貉稽曰稽大不理於口

貉音陌

趙氏曰貉姓稽名為衆口所訕

所晏反

理賴也今按漢

書無俚

音里

方言亦訓賴

前漢季布贊賢者誠重其死夫婢妾賤人感慨而自殺非

能勇也其畫無俚之至耳晉灼曰楊雄方言曰俚聊也許慎曰賴也○慶源輔氏曰大不賴於口者言大

為衆口所訕也

孟子曰無傷也士憎茲多口

趙氏曰為士者益多為衆口所訕按此則憎當從土

今本皆從心蓋傳寫之誤

新安陳氏曰為士者往往見憎於此多口如語之屢

憎於人

詩云憂心悄悄惓于羣小孔子也肆不殄厥惓亦不隕

厥問文王也

詩邶

蒲昧反

風柏舟及大雅緜之篇也悄悄憂貌惓怒

也本言衛之仁人見怒於羣小孟子以為孔子之事

可以當之

如見毀於叔孫是也

肆發語辭

南軒張氏曰肆猶言遂也承上起下之辭

隕墜也問聲問也本言大王事昆夷雖不能殄絕其  
愠怒亦不自墜其聲問之美孟子以為文王之事可

以當之

如見囚於  
羑里是也

○尹氏曰言人顧自處

上聲如何盡

其在我者而已

新安陳氏曰文王孔子二聖人尚不免逢人之愠怒況今能絕衆口之謗

訕乎惟在自反而盡其在我者耳○東陽許氏曰此章言文王孔子雖有聖人之德亦不免為衆口所謗訕而其所以處之者如此然人雖謗之終不能損其令名孟子意謂稽雖為衆口所訕但當自脩其德而已

○孟子曰賢者以其昭昭使人昭昭今以其昏昏使人

昭昭

昭昭明也昏昏闇

與暗同

也尹氏曰大學之道在自昭

明德而施於天下國家其有不順者寡矣

慶源輔氏曰以己昭

昭使人昭昭者求之己也以己昏昏使人昭昭者求之人也尹氏引大學之說當矣能明明德則施於天下國家其有不順者寡矣若不自明其德則如面牆一物無所見一步不可移難至近如妻子亦且不順況他人乎

○孟子謂高子曰山徑之蹊間

句

介然用之而成路

句

為間不用則茅塞之矣今茅塞子之心矣

介音憂

徑小路也蹊人行處也介然倏然之頃也用由也路  
大路也為間少頃也茅塞茅草生而塞之也言理義

之心不可少有間

去聲斷徒玩反

也

趙氏曰高子齊人嘗學於孟子去而學他

術○慶源輔氏曰理義之心人所固有雖易發而亦易窒善端發處體察而力充之則可以成德否則內為氣習所蔽外為物欲所誘而遂窒之矣○新安陳氏曰學問漸進則理義日開學問纔止則理義日窒氣習物欲皆塞理義之心之茅也學問廢弛譬之茅又生而塞子之心矣高子為人如前篇論小弁後章論禹文王樂其固陋窒塞可見○東陽許氏曰山間之小徑倏然有人行而不斷即成大路少頃無人行則茅長而遂塞之學問之道才有間斷私欲便生而塞天理之路矣

○高子曰禹之聲尚文王之聲

尚加尚也豐氏曰言禹之樂過於文王之樂

孟子曰何以言之曰以追蠡

追音堆  
蠡音禮

豐氏曰追鐘紐

女九反

也周禮所謂旋蟲是也

趙氏曰  
按周禮

考工記鐘縣平聲謂之旋旋蟲謂之幹蓋縣鐘之紐也其形如環環有盤旋之義於旋之上為蟲形以飾之自漢以來鐘旋之上以銅篆作蹲熊及盤龍獸名辟邪皆旋蟲之類也

蟲者齧

倪結反

木

蟲也言禹時鐘在者鐘紐如蟲齧而欲絕盖用之多而文王之鐘不然是以知禹之樂過於文王之樂

也

曰是奚足哉城門之軌兩馬之力與

與平聲

豐氏曰奚足言此何足以知之也軌車轍迹也兩馬

一車所駕也城中之涂

與途同

容九軌

周禮冬官下匠人營國方九里

旁三門國中九經九緯經涂九軌國中城內也經緯謂涂也經緯之涂皆容方九軌凡八尺為軌廣九軌積七十二尺則此涂十二步也車可散行故其轍迹淺城門惟容一

車車皆由之故其轍迹深盖日久車多所致非一車

兩馬之力能使之然也

借此以為鐘歷年久之譬

言禹在文王前



千餘年故鐘久而紐絕文王之鐘則未久而紐全不可以此而議優劣也○此章文義本不可曉舊說相承如此而豐氏差

初賣反較也

明白故今存之亦未知其

是否也

○齊饑陳臻曰國人皆以夫子將復為發棠殆不可復

復扶又反

先時齊國嘗饑孟子勸王發棠邑之倉以振貧窮至此又饑陳臻問言齊人望孟子復勸王發棠而又自

言恐其不可也

華陽范氏曰孟子在賓師之位方以仁義說齊王幸而聽其言故發棠邑

之粟然而不行王政孟子言終不合及再饑孟子遂不復言度其不可言也

孟子曰是為馮婦也晉人有馮婦者善搏虎卒為善士則之野有衆逐虎虎負嵎莫之敢撻望見馮婦趨而迎之馮婦攘臂下車衆皆悅之其為士者笑之

手執曰搏卒為善士後能改行

去聲

為善也之適也負

依也山曲曰嵎撻觸也笑之笑其不知止也疑此時齊王已不能用孟子而孟子亦將去矣故其言如此

南軒張氏曰世固有勇於為善事者不察夫義理之當然與否而必為之蓋亦足以悅於流俗然發不中節有害於君子之道是皆馮婦之類耳學者其無惑於衆之悅而有動哉審諸己而已矣○慶源輔氏曰齊人之所望於孟子者利也而孟子之所以自守者義也夫告君以發粟振民是亦美事固君子所樂為者但是時齊王已不能用孟子而孟子亦將去矣故其義不當復有所言耳君子之所為與時變化不主故常唯義理如何耳豈徇其常所為者以取人之屢快哉○新安陳氏曰勸王發倉振饑仁也知時不可言而不言智也

○孟子曰口之於味也目之於色也耳之於聲也鼻之於臭也四肢之於安佚也性也有命焉君子不謂性也

程子曰五者之欲性也

性之所欲此即然有分去聲

能皆如其願則是命也

願即欲也命則天理之不可則也不可踰越其分限

謂我性之所有而求必得之也愚按不能皆如其願

不止為貧賤蓋雖富貴之極亦有品節限制則是亦

有命也

朱子曰此性字指氣質而言此命字合理與氣而言五者之欲固是人性然有命分既不

可謂我性之所有而必求得之又不可謂我分可以得而必極其欲如貧賤不能如願此固分也富貴之極可以無所不為然亦有限制裁節又當安之於理如紂之酒池肉林却是富貴之極而不知限節若以其分言之固無不可為但道理却恁地不得今人只說得一邊不知合而言之未嘗不同也○新安陳氏

曰此命字合理與氣言貧賤之安於分此以氣言也富貴之不過其則此以理言也

仁之於父子也義之於君臣也禮之於賓主也智之於賢者也聖人之於天道也命也有性焉君子不謂命也

程子曰仁義禮智天道在人則賦於命者所稟有厚薄清濁然而性善可學而盡故不謂之命也張子曰

晏嬰智矣而不知仲尼是非命邪

朱子曰橫渠有云晏嬰智矣而不知

仲尼是非命歟此命字恐作兩般看若作所稟之命則是嬰稟得智之淺者若作命分之命則是嬰偶蔽於此遂不知夫子此當作兩般看愚按所稟者厚而清則其仁之於

父子也至義之於君臣也盡禮之於賓主也恭智之

於賢否也哲聖人之於天道也無不脗

武粉反一音泯

合而

純亦不已焉薄而濁則反是是皆所謂命也或曰者

當作否人行字更詳之

朱子曰命也有性焉此命字專指氣而言此性字專指理

而言如舜遇瞽瞍固是所遇氣數然舜惟盡事親之道期於底豫此所謂盡性大凡清濁厚薄之稟皆命也一以所稟言之一以所值言之所造之有淺有深所感之有應有不應但其命雖如此又有性焉故當盡性○或說以五者之命皆為所值之不同如舜之於瞽瞍則仁或不得於父子文王之於紂則義或不得於君臣孔子之於陽貨則禮或不得於賓主子貢不能聞一知十則智或不得於賢者孔子不得堯舜

之位則聖人或不得於天道此皆命也然君子當勉其在己者而不歸之命其義亦通○雲峯胡氏曰此命字專指氣而言然氣亦有二清濁美惡氣質之不齊也高下厚薄脩短氣數之有異也○愚聞

之師曰此二條者皆性之所有而命於天者也然世

之人以前五者為性雖有不得而必欲求之以後五

者為命一有不至則不復

扶又反

致力故孟子各就其

重處言之

前重在命後重在性

以伸此而抑彼也

伸後抑前

張子所

謂養則付命於天道則責成於己其言約而盡矣

朱子

曰口之於味五者此固性之所欲然在人則有所賦之分在理則有不易之則皆命也是以不謂之性而

付命於天仁之於父子五者在我則有厚薄之稟在彼則有遇不遇之殊是皆命也然有性焉君子不謂之命而責成於己須如此看意思方圓無欠缺處○口之於味等固是性然亦便是合下賦予之命仁之於父子等固是命然亦是各得其所受之理便是性孟子恐人只見得一邊故就其所主而言舜禹相授受只說人心惟危道心惟微論來只有一箇心人心如口之於味等若以為性所當然一向惟意所欲却不可蓋有命存焉須著安於定分不敢少過始得道心如仁之於父子等若以為命已前定任其如何更不盡心却不可蓋有性存焉須著盡此心以求合乎理始得上云性也是氣稟之性有命焉是斷制人心欲其不敢過也下云命也蓋其所受氣稟亦有厚薄之不齊有性焉是充廣道心欲其無不及也此段只要逼人欲長天理前一節人以為性我所有須要必得後一節以為命則在天多委之而不脩所以孟子



到人說性處却曰有命人說命處却曰有性○且如嗜窮泰而厭慕藿是性如此然窮泰分無可得只得且喫慕藿如父子有親有相愛底亦有不相愛底有相愛深底亦有相愛淺底此便是命然在我有薄處便當勉強以致其厚在彼有薄處吾當致厚感他得他亦厚如瞽瞍之頑舜使能使烝烝乂不格姦○問仁義禮智天道此天之所以命於人所謂本然之性者也今日曰命有厚薄則是本然之性有兩般也若曰伊川以厚薄言人氣質稟受於陰陽五行者如此孟子不應言命若以氣質厚薄言命則是天之降才為有殊矣曰孟子言降才且如此說若命則誠有兩般以稟受有厚薄也又不可謂稟受為非命也大抵天命流行物各有得不謂之命不可也命如人有貧富貴賤豈不是有厚薄知之於賢者則有小大聖人之於天道亦有盡不盡處只如堯舜性之則是盡天道湯武身之則是於天道未能盡也此固是命然不可

不求之於性○潛室陳氏曰世人以上五者為性則見血氣而不見道理以下五者為命則見氣數而不見道理於是人心愈危道心愈微孟子於常人說性處却以命言則人之於嗜慾雖所同有却有品節限制不可必得而人心安矣於常人說命處却以性言則人之於義理其氣稟雖有清濁不齊須是著力自做工夫不可一委之天而道心顯矣

○浩生不害問曰樂正子何人也孟子曰善人也信人也

趙氏曰浩生姓不害名齊人也

何謂善何謂信

不害問也

曰可欲之謂善

天下之理其善者必可欲其惡者必可惡

去聲下同

其為

人也可欲而不可惡則可謂善人矣

朱子曰可欲是資稟好別人以

為可欲是說這人可愛也只是渾全一箇好人其為人處心造事行已接物一皆可欲而不可惡則可謂之善人矣○有可欲之善然後有諸己而充實將去若無可欲者則充實箇甚物譬如先討得真實藥材然後脩製以為圓為散若是藥材不真雖百般羅碾畢竟不是○問可欲之謂善若作人去欲他恐與有諸己之謂信不相協蓋有諸己是說樂正子身上事可欲却做人說恐未安曰此便是他有可欲處人使

欲他豈不是渠身上事與下句非不相協○慶源輔氏曰先儒多以可欲為己之欲如書所謂敬脩其可願之意獨集註不然可欲是別人以為可欲蓋若以為己之欲則說得太輕且人之欲有善惡之不同故也

有諸己之謂信

凡所謂善皆實有之如惡

去聲

惡臭如好

去聲

好色是則

可謂信人矣

慶源輔氏曰善固多端故集註言凡所謂善以該之如惡惡臭如好好色則表

裏誠實無一毫勉強假托之意也

○張子曰志仁無惡之謂善誠善

於身之謂信

朱子曰善人者或其天資之美或其知及之而勉慕焉未必其真以為然而果

能不失也必其用力之久真實有此善於己而無一毫虛偽意然後可以謂之信人矣

### 充實之謂美

力行其善至於充滿而積實則美在其中而無待於

外矣

朱子曰無待於外都是裏面流出來○既信之則其行必力其守必固如是而不已焉則其所

有之善充足飽滿於其身雖其隱微曲折之間亦皆清和純懿而無不善之雜是則所謂美人也○有諸己之謂信是都知得了實是如此做此是就心上說心裏都理會得充實之謂美是就行上說事事都行得盡充滿積實美在其中而無待於外○慶源輔氏曰有諸己則己是知至意誠之事然又須見於履踐方得故云力行其善至於充滿其量蓄積成實然後美在其中而無所待於外矣

充實而有光輝之謂大

和順積中而英華發外

引記樂  
記云

美在其中而暢於四

支發於事業

引易坤  
卦文言

則德業至盛而不可加矣

朱子  
曰美

能充於內而已未必其能發見於外也又如是而不  
已焉則其善之充於內者彌滿布濩洋溢四出而不  
可禦其在躬也則睟面盎背而施於四體其在事也  
則德盛仁熟而天下文明是則所謂大人者也○慶  
源輔氏曰大則形見於外矣故  
集註以德業至盛不可加言之

大而化之之謂聖

大而能化使其大者泯然無復

扶又  
反

可見之迹則不

思不勉從

七容反

容中

去聲

道而非人力之所能為矣張

子曰大可為也化不可為也在熟之而已矣

程子曰大而化

之只是理與己一其未化者如人操尺度量物用之尚不免有差至於化則己便是尺度尺度便是己○朱子曰大而不化則其大者未能離乎方體形迹之間必其德之盛者日益盛仁之熟者日益熟則向之所謂大者方且春融凍解混然無迹而與天地合德日月合明四時合序鬼神合吉凶矣是則所謂聖人者也○慶源輔氏曰大則猶可以目見而指言至於化則無迹不可以目見不可以言傳無待於思惟無假於勉強從容自然與道為一而非人之智力所能及矣

聖而不可知之謂神

程子曰聖不可知謂聖之至妙人所不能測非聖人

之上又有一等神人也

朱子曰至於聖則造道入德之功至矣盡矣不可以有加

矣是其盛德至善之極無聲無臭之妙必有非耳目所能盡心思所能測者是則所謂神者而非聖人之上復有神人也夫自可欲而至於大則思勉之所及也至於聖且神焉則非思勉之所及矣然非思勉之而不已焉則亦未有至焉者也○問可欲之謂善至聖而不可知之謂神曰善渾全底好人無可惡之惡有可喜可欲之善有諸己之謂信真箇有此善若不有諸己則若存若亡不可謂之信自此而下雖一節深如一節却易理會充實謂積累光輝謂發見於外化則化其大之之迹聖而不可知處便是神也所以明道言仲尼無迹顏子微有迹孟子其迹著或問顏子之微有迹處曰如願無伐善無施勞皆是○此六



位皆他人指而名之之辭○南軒張氏曰本領在可欲之善信者信此者也美者美此者也大則充此而有光輝也化則為聖而其不可知則神也至於聖且神其體亦不外此而已又曰可欲之善聖神之事備焉人生而靜皆具此體至於化而聖然後為全盡純於此者也

### 樂正子二之中四之下也

蓋在善信之間觀其從於子教則其有諸已者或未

實也

問樂正子以善名矣而以鋪啜從子教先館舍後長者何也朱子曰言在二者之中則其餘於

善而不足於信矣○慶源輔氏曰意者樂正子雖能明善而亦工夫未到於善未誠使其誠有諸已則於從子教之事當如惡惡臭而自不嚮通也張子曰顏淵樂正子皆知好

去聲

同仁矣

新安陳氏曰樂正子資質純粹略似顏子故橫渠引此立論

樂正子志仁

無惡而不致於學所以但為善人信人而已顏子好

學不倦合仁與智具體聖人獨未至聖人之止耳

慶源

輔氏曰張子并顏子言之見學之不可已如此

○程子曰士之所難者在有

諸已而已能有諸已則居之安資之深而美且大可

以馴

音旬

致矣徒知可欲之善而若存若亡而已則能

不受變於俗者鮮矣

上聲

慶源輔氏曰程子又發明學者只要有諸已而諸已則住

不得自然趨將去故美且大可以馴致不然徒知其善而若存若亡則為流俗所變而終亦必亡之矣○

新安陳氏曰此條重在有諸己之信 尹氏曰自可欲之善至於聖而不

可知之神上下一理擴充而至於神則不可得而名

矣慶源輔氏曰尹氏上下一理之說尤得其要惟其不可得而名故謂之神也○雲峯胡氏曰須看尹

氏上下一理四字善者人心之天理始而為人之所可欲者此理也終而人之所不可知者亦此理也善非粗淺神非高虛惟在乎實有此善而力行以充之爾○新安陳氏曰自善信至聖神高下固懸絕矣然雖聖神之極致亦不外乎自善信而充之生知安行之聖人固不必由料級而進學知利行以下之希聖未有不由料級而進者可欲之善真能有諸己勉勉循循充而拓之以至於極雖比性之之聖有生熟之不同豈有不能如身之之聖者

○孟子曰逃墨必歸於楊逃楊必歸於儒歸斯受之而已矣

墨氏務外而不情楊氏太簡而近實故其反正之漸

大略如此歸斯受之者憫其陷溺之久而取其悔悟

之新也

朱子曰楊墨皆是邪說無大輕重但墨氏之說尤出於矯偽不近人情而難行故孟子之

言如此非以楊氏為可取也○南軒張氏曰兼愛者棄本而外馳為我者狹隘而秘勝墨之比楊猶奢之比儉自為者固非猶愈於兼愛之泛也泛者尤難反耳

今之與楊墨辯者如追放豚既入其豎又從而招之

放豚放逸之豕豚也豈闌也招胃

反扁縣

也羈其足也

言彼既來歸而又追咎其既往之失也○此章見聖

賢之於異端距之甚嚴而於其來歸待之甚恕距之

嚴故人知彼說之為邪待之恕故人知此道之可反

仁之至義之盡也

雲峯胡氏曰於異端距之甚嚴者至正不可以容邪義之盡也來歸

待之甚恕者至大可以容小仁之至也於此可見聖賢至正至大之心矣

○孟子曰有布縷之征粟米之征力役之征君子用其一緩其二用其二而民有殍用其三而父子離

征賦之法歲有常數然布縷取之於夏粟米取之於

秋力役取之於冬當各以時若并去聲取之則民力有

所不堪矣

新安陳氏曰用其二一時併用二端也用其三一一時併取三者也

今兩稅

三限之法亦此意也尹氏曰言民為邦本取之無度

則其國危矣

慶源輔氏曰此孟子言之以警夫取民無度者○問布縷粟米力役之征周禮

皆取之而孟子言用其一而緩其二朱子乃有夏秋之辨夫夏秋之說始出於唐不知何所據而云潛室

陳氏曰緩非廢其征但不作一時併征之耳月令孟夏蠶畢而獻繭稅孟秋農乃登穀始收穀布縷征之

夏粟米征之秋乃古法若唐分兩稅始於德宗楊炎非止布縷粟米之征乃是取大歷十四年應干賦歛

之數併而為兩稅名同  
寶異失孟子之意矣

○孟子曰諸侯之寶三土地人民政事寶珠玉者殃必  
及身

尹氏曰言寶得其寶者安寶失其寶者危

新安陳氏  
曰諸侯寶

人民而善政事以治之則  
有人有土而常為吾寶矣

○盆成括仕於齊孟子曰死矣盆成括盆成括見殺門  
人問曰夫子何以知其將見殺曰其為人也小有才未  
聞君子之大道也則足以殺其軀而已矣

盆成姓括名也恃才妄作所以取禍徐氏曰君子道其常而已括有死之道焉設使幸而獲免孟子之言

猶信也

南軒張氏曰不聞道則為才所役道者理義之存乎人心者也於此有聞則才有所不敢

恃矣人之有才本不足以為人害惟無所本而徒用其才於是才始足以病己甚至有取死之道又不若魯鈍無才之愈也小有才而未聞道者身且不能保為國者乃信而用之亡國敗家其何日之有○慶源輔氏曰才出於氣而有限才本自小道原於性而無方道本自大況曰小有才則又才之小者也不顧義理而唯才是逞則行險僥倖無所不至不至於顛覆不已也孟子之言但述其理之當然耳不以是為奇中也學者不達而以是為奇則必以料事為明而駁駁然入於逆詐億不信矣



○孟子之滕館於上宮有業屨於牖上館人求之弗得  
館舍也上宮別宮名業屨織之有次業而未成者蓋  
館人所作置之牖上而失之也

或問之曰若是乎從者之廖也曰子以是為竊屨來與

曰殆非也夫子之設科也往者不追來者不拒苟以是

心至斯受之而已矣

從為去聲與平聲夫子如字舊讀為扶余者非

或問之者問於孟子也廖

與度同

匿也言子之從者乃

匿人之物如此乎孟子答之而或人自悟其失因言

此從者固不為

去聲

竊屨而來但夫子設置科條以待

學者苟以向道之心而來則受之耳雖夫子亦不能

保其往也門人取其言有合於聖賢之指故記之

慶源

輔氏曰先儒多讀夫子作夫音狀予而以為孟子自說朱子獨以為夫子而作問者自悟其失而言者蓋不獨以殆非也下無曰字而知其然若以為孟子之言則不惟露筋骨且非所以待學者將使學者不自重矣惟以為問者之言則可取愚嘗謂近世好議論者往往以學者之失而議先生長者是其識量又不逮於當時纖屨者矣苟以是心至斯受之者與人為善之公也至於孺悲欲見則辭以疾膝更在門則不見答是又義之所當然也然教亦固在其中矣

○孟子曰人皆有所不忍達之於其所忍仁也人皆有所不為達之於其所為義也

惻隱羞惡之心人皆有之故莫不有所不忍不為此仁義之端也然以氣質之偏物欲之蔽則於他事或有不能者但推所能達之於所不能則無非仁義矣

慶源輔氏曰不忍者惻隱之事也不為者羞惡之事也是皆本於性發於情而統於心人之所固有者也但為氣稟所拘物欲所蔽則心失其正而不能統夫性與情故有所當發而不發亦有所不當發而反發遂至於其所不忍者或有時而忍於其所不為者或有時而為而性亦從而梏亡之矣今教之以推所不

忍以達於所忍推所不為以達於所為如是則心得其職情得其正而性之所以為仁義者得矣○西山真氏曰有所不忍不為者此心之正也能即是心而推之雖所忍者亦不忍即仁也雖所為者亦不為即義也

人能充無欲害人之心而仁不可勝用也人能充無穿

窬之心而義不可勝用也

勝平聲

充滿也穿穿穴窬踰牆皆為盜之事也能推所不忍以達於所忍則能滿其無欲害人之心而無不仁矣能推其所不為以達於所為則能滿其無穿窬之心

而無不義矣

南軒張氏曰人皆有所不忍皆有其所不為此其秉彝之不可泯滅者也然有所不

不忍矣而於他則忍之有所不為矣而於他則為此豈有異心哉為私欲所蔽而生道息故也若以其所不忍而達之於其所忍豈非仁乎以所不為而達之於其所為豈非義乎自無欲害人之心而充之則其愛無所不被仁有不可勝用矣自無穿窬之心而充之則其宜無所不得義有不可勝用矣蓋其理本具於性貴於充之而已○慶源輔氏曰此一節因前說而教人以充滿其本心之量也無欲害人之心即是所不忍無穿窬之心即是所不為是心也其量甚大其用有常人能推所不忍以達於其所忍然後能充滿其無欲害人之心量推所不為以達於其所為然後能充滿其無穿窬之心量能充滿其心量則其用有常而仁義不可勝用矣○新安陳氏曰達如導水自畎澮達之川自川達之海充此水達海而充滿

於其中也惟達而後能  
充如擴而充之之意

人能充無受爾汝之實無所往而不為義也

此申說上文充無穿窬之心之意也蓋爾汝人所輕  
賤之稱人雖或有所貪昧隱忍而甘受之者然其中  
心必有慚忿而不肯受之之實人能即此而推之使  
其充滿無所虧缺則無適而非義矣

問充無受爾汝之實朱子曰惡

不仁者其為仁矣不使不仁者加乎其身惡不仁而  
不能使不仁者不加乎其身便是不能充無受爾汝  
之實○看來實字對名字說不欲人以爾汝之稱加  
諸我是惡爾汝之名也然反之於身而去其有可爾

汝之行是能充其無受爾汝之實也若我身有未是處則雖惡人以爾汝相稱亦自有所愧矣○新安陳氏曰朱子此條乃用趙計之說與集註不同蓋謂惡爾汝之名是惡人之輕己也反身而去其可輕之行是能充其無受爾汝之實也人能充滿其無受爾汝之實行則所為無往非義矣意義較明白○慶源輔氏曰此一節事雖微而理愈密夫人不受爾汝之稱皆是羞惡之實心存養之不加體察之不至則不受之心雖有得於此而或遂失於彼亦不能充滿其實心之量而義有時而不行矣惟能推所不受而達之於所受而無所滲矣然後能充滿其無受爾汝實心之量無所適而不為義也

士未可以言而言是以言餽之也可以言而不言是以

不言餽之也是皆穿窬之類也

餽音忝

餽探取之也今人以舌取物曰餽即此意也使平聲佞

未可以言而隱默可以言而不言皆有意探取於人是亦穿窬之

類然其事隱微人所忽易去聲故特舉以見反形句例明

必推無穿窬之心達於此而悉去上聲之然後為能充

其無穿窬之心也

朱子曰餽是鈎致之意如本不必說自家却強說幾句要去動人要

去悅人是以言餽之也如合當與他說却不說須故為隱難要使他來問我是以不言餽之也不直心而私意如此便是穿窬之類裏面是如此外面却不如此外面恁地裏面却不恁地○問此章先言仁義後專言義何也曰仁只是一路只是箇不忍之心苟能充此心便了義却頭項多又問人能充無穿窬之心



是就至粗處說未可以言而言與可以言而不言是  
說人至細處否曰然能充無受爾汝之實處工夫却  
甚大了到這田地時工夫太段周密了所以說無所  
往而不為義也使行已有一毫未盡使不能無受爾  
汝之實矣達者推之也是展開去充者填滿也須填  
塞教滿○南軒張氏曰以言取之者其猶以詔為悅  
者乎以不言取之者其猶以默為容者乎以是為穿  
窬之類者以若有取之之心故耳此章始言仁義而  
未獨言義何也蓋仁義體用相須者也人之不仁以  
非義害之也不為非義而後仁可得而存故反復再  
三推而言之使人知所用力也○慶源輔氏曰此一  
節事之微而理之密又有甚於前者故以士言之夫  
不為穿窬無受爾汝在士則有所不必道然一語一  
默之微而於計較安排而有意探取於人則是亦穿  
窬之類故集註亦以為其事隱微人所忽易故特舉  
以見例必推無穿窬之心而達之於此類至纖至悉

處亦不容有不盡方始能充其無穿窬之心也其義亦精矣○雲峯胡氏曰孟子首篇曰善推其所為欲齊王即其不忍之心而推之也末篇曰達曰充欲人皆即其有所不忍不為之心而達之充之也擴此心之用無少壅遏則謂之達滿此心之量無少欠缺則謂之充集註論此達與充二字而推之一字凡五及之達者推之始充者推之終也不推不能達不達不能充集註可謂能發孟子終始教人之本旨矣先儒云孟子平生工夫受用處只在善推其所為一句爾非朱子孰能發之哉○新安陳氏曰此章後二節單言義無受爾汝之實正其行也戒以言不言誥之正其言也正其言行以充其羞惡之心乃於稱謂語默日用之常事以求義之精焉語曰色厲內荏其猶穿窬與表記曰君子不以色親人情疏而貌親在小人則穿窬之盜也與皆可充廣此義所當參玩

○孟子曰言近而指遠者善言也守約而施博者善道

也君子之言也不下帶而道存焉

施去聲

古人視不下於帶

記曲禮下天子視不上於衿音劫不下於帶凡視上於面則傲下於

帶則憂傾則姦

則帶之上乃目前常見至近之處也舉目前

之近事而至理存焉所以為言近而指遠也

朱子曰說言近

指遠守約施博四方八面皆看得見此理本是遠近博約如一而行之則自近約始道理只是一但隨許

多頭面去又不可不逐頭面理會也○慶源輔氏曰言近而指遠故測之而益深窮之而愈遠是君子

教人之事

君子之守脩其身而天下平

此所謂守約而施博也

南軒張氏曰所謂指遠者固存乎近所謂施博者固存乎

約也不下帶而道存言近而指遠也蓋其所言只其身中事在目前者耳而至理初不外是也脩身而天下平守約而施博也脩身則本立由是而家齊國治天下平皆其所推耳○慶源輔氏曰守約施博故推之而無不準動之而無不化是君子治天下之事

人病舍其田而芸人之田所求於人者重而所以自任

者輕

捨舍音捨

此言不守約而務博施之病

朱子曰不知道者務為高遠之言則固荒唐而

無餘味然欲其近則又鄙淺而無深遠之趣也  
約之可守則固泛濫而不切矣然欲其約則又狹隘  
而無廣博之功也然則所謂善言善道者非有道之  
君子其孰能知之乎○南軒張氏曰舍其田而芸人  
之田者不治其身而治人之譬也不務在己者而責  
諸人其自任亦輕矣蓋不知一身為天下之本故也  
○孟子曰堯舜性者也湯武反之也

性者得全於天無所污

烏故反

壞不假脩為聖之至也

反之者脩為以復其性而至於聖人也程子曰性之  
反之古未有此語蓋自孟子發之呂氏曰無意而安

行性也

朱子曰呂氏說性也  
性下合添之者二字

有意利行而至於無意

復性者也堯舜不失其性湯武善反其性及其成功

則一也

程子曰堯與舜更無優劣及至湯武便別孟子言性之反之自古無人如此說只是孟子

分別出來便知得堯舜是生而知之湯武是學而能之文王之德則似堯舜禹之德則似湯武要之皆是聖人○朱子曰湯武反之其反之雖同然細看來武王終是踈略成湯却孜孜向進如其伐桀所以稱桀之罪只平說過又放桀之後惟有慙德武王數紂至於極其過惡於此可見矣

動容周旋中禮者盛德之至也哭死而哀非為生者也

經德不回非以干祿也言語必信非以正行也

中為行並去聲

細微曲折無不中禮乃其盛德之至自然而中而非

有意於中也經常也回曲也三者亦皆自然而然而非

有意而為之也皆聖人之事性之德也

問信言語以正行莫

無害否朱子曰言語在所當信若有意以此而正行便是有為而然也○慶源輔氏曰若有意於中則也有勉強持守之意力懈意弛則必有所不中者矣又曰三者特舉聖人之庸行人所易曉者以例其餘聖人之動無不時也豈有意而為之者哉故集註斷以為聖人之事性之德也

君子行法以俟命而已矣

法者天理之當然者也君子行之而吉凶禍福有所

不計蓋雖未至於自然而已非有所為

去聲

而為矣此

反之之事董子所謂正其義不謀其利明其道不計

其功正此意也○程子曰動容周旋中禮者盛德之

至行法以俟命者朝聞道夕死可矣之意也

新安陳氏曰惟

聞道故生順死安雖夕死亦可惟行法故禍福能一聽天命其意相類

呂氏曰法由此

立命由此出聖人也

新安陳氏曰以法與命移上聖人說聖人從容中道身即為度

法由我立與天為徒命由我出與天地合德與鬼神合吉凶如書云自作元命唐李泌云君相造命是也

行法以俟命君子也聖人性之君子所以復其性也

朱子曰聖人是人與法為一己與天為一學者是人未與法為一己未與天為一故須行法以俟命也○



行法以俟命三代以降惟董子嘗言之而諸葛忠武侯言於其君有曰臣鞠躬盡力死而後已至於成敗利鈍非臣之明所能逆覩也程子語其門人有曰今容貌必端言語必正非欲獨善其身以求知於人但天理當然亦得循之而已矣此三言者所指雖殊要皆行法俟命之意○慶源輔氏曰法者凡古聖賢之所制皆是也蓋莫非天理之當然如為君而仁為臣而敬子孝父慈皆是也君子行之而吉凶禍福聽天所命我皆在所不計所謂俟命也雖未能如聖人之安行自然已非有為而為之矣

○孟子曰說大人則藐之勿視其巍巍然

說音稅  
藐音眇

趙氏曰大人當時尊貴者也藐輕之也巍巍富貴高顯之貌藐焉而不畏之則志意舒展言語得盡也

靖和

尹氏曰藐者止是不以其貴勢威嚴為事而憚非謂  
使視他作無物也○朱子曰說大人則藐之蓋主於  
說而言如曰見大人則藐之則失之矣蓋大人固當  
畏而所謂藐者乃是藐其堂高數仞之類耳道為世  
人把大人許多崇高富貴當事有言不敢出口故孟  
子云爾○今人不是畏大人只是畏其巍巍然者若  
能勿視其巍巍然而不失其畏大人之心乃是真能  
畏大人者○問孔子畏大人而孟子藐之何也曰孟  
子藐大人不視其巍巍然者而已故雖不肯枉尺直  
尋而齊人敬王莫如孟子也特以當世之士以道殉  
人內無所守故特發此以立其志使其意氣舒展無  
所懾懼而得以盡其所言爾若君子以禮存心固將  
無所不用其敬豈於大人而反藐之哉○慶源輔氏  
曰若不藐視之則是為其巍巍者所動矣志氣一有  
所懾怯則必不能展盡底蘊剛强者有懷或不敢  
盡柔弱者則必至於變其所欲言而反徇之矣

堂高數仞榱題數尺我得志弗為也食前方丈侍妾數百人我得志弗為也般樂飲酒驅騁田獵後車千乘我得志弗為也在彼者皆我所不為也在我者皆古之制

也吾何畏彼哉

榱楚危反般音盤  
樂音洛乘去聲

榱

音角

也題頭也食前方丈饌食列於前者方一丈

也此皆其所謂巍巍然者我雖得志有所不為而所

守者皆古聖賢之法則彼巍巍者何足道哉

南軒張氏曰巍

讀如眇左氏曰以是藐諸孤藐小之也小之者小其所挾也視其巍巍然則動於中動於中則慕在彼之

勢而屈在我之義矣使在我不知古制之守則為其  
巍巍然所動矣故程子曰內重則見外之輕得深則  
見誘之小後之為士者惟不知古制之是守故未得  
志則有所慕既得志則行其所慕遂欲不已以為天  
下害士必寡欲而後能守古制守古制而後知自重  
知自重而後不為勢所屈使其身用而道行則生民  
受其福矣 ○楊氏曰孟子此章以己之長方人之短猶有

此等氣象在孔子則無此矣

慶源輔氏曰孟子有泰山巖巖然之氣象便是

指此等處言也若聖人則大而化之泯然不見其大之迹故不至如此然非聖人覺此而不為也德盛仁熟大而化之則自然不至有此等氣象矣

○孟子曰養心莫善於寡欲其為人也寡欲雖有不存

焉者寡矣其為人也多欲雖有存焉者寡矣

欲如口鼻耳目四支之欲雖人之所不能無然多而

不節未有不失其本心者學者所當深戒也程子曰

所欲不必沈溺只有所向便是欲

周子曰養心不止於寡而存耳蓋寡

之又寡以至於無則誠立明通○蔡氏曰誠立而實體安固明通而實用流行○程子曰欲寡則心貞誠荀子言養心莫善於誠既誠矣又何養此已不識誠又不知所以養○朱子曰孟子只是言天理人欲相為消長分數其為人也寡欲則人欲分數少故雖有不存焉者寡矣不存焉者寡則天理分數多也其為人也多欲則人欲分數多故雖有存焉者寡矣存焉者寡則天理分數少也蓋多字對寡字說若眼前事

事貪要時這心使一齊走出了未便說到邪僻不好  
底物事只是眼前底事纔多欲本心便都分雜了只  
減少便漸存得此心問周子之言曰語其所至則固  
然矣然未有不由寡欲而能至於無者語其所至而  
不由其序則無自而進由其序而不要其至則或恐  
其安於小成也周子之說於此為有相發之功焉○  
伊川教人直是都不去他用其心只是要得寡欲存  
這心最是難湯武聖人孟子猶說湯武反之也反復  
也反復得這本心如不遏聲色不殖貨利只為要存  
此心觀旅獒之書只受一犬而反覆切諫以此見欲  
之可畏無小大皆不可忽○南軒張氏曰寡欲為養  
心之要然人固有天資寡欲者有天資多欲者其為  
人寡欲則不存者寡多欲則存焉者寡以是知養心  
莫善於寡欲也存者謂其心之外馳也雖然天資  
寡欲之人不存固寡然不知存其存則亦莫之能充  
也若學者以寡欲為要則當存養擴充由寡欲以至

於無欲則其清明高遠者為無窮矣○勉齋黃氏曰  
孟子嘗言求放心矣又言存其心矣操之則存舍之  
則亡心之存亡決於操舍而又曰莫善於寡欲何也  
操存固學者之先務然人惟一心而攻之者衆聲色  
臭味交乎外榮辱利害動乎內隨感而應無有窮已  
則清明純一之體又安能保其常存而不放哉此孟  
子發明操存之說而又以為莫善於寡欲也雖然寡  
欲固善矣然非真知夫天理人欲之分則何以施其  
克治之功哉故格物致知又所以為寡欲之要此又  
學者之所當察也○慶源輔氏曰程子又極其微而  
言之學者須是於欲有所向處便加克治若待其張  
皇則用力難矣○雲峯胡氏曰孟子一書三養字皆  
切要語曰養氣曰養性曰養心合而觀之氣生於理  
善養氣者在養性理具於心善養性者在養心心汨  
於欲善養心者在寡欲寡之又寡以  
至於無則心存而性存氣不必言矣

○曾皙嗜羊棗而曾子不忍食羊棗

羊棗實小黑而圓又謂之羊矢棗曾子以父嗜之父  
沒之後食必思親故不忍食也

公孫丑問曰膾炙與羊棗孰美孟子曰膾炙哉公孫丑  
曰然則曾子何為食膾炙而不食羊棗曰膾炙所同也  
羊棗所獨也諱名不諱姓姓所同也名所獨也

肉聶而切之為膾

聶之涉反詳見論語鄉黨篇膾不厭細章下

炙

之夜反

炙

音肉也

勿軒熊氏曰須看不忍字重毋沒而杯圈不能飲不忍故也○新安陳氏曰不諱姓喻食



膾炙諱名喻

不食羊棗

○萬章問曰孔子在陳曰盍歸乎來吾黨之士狂簡進取不忘其初孔子在陳何思魯之狂士

盍何不也狂簡謂志大而略於事進取謂求望高遠不忘其初謂不能改其舊也此語與論語小異

慶源輔氏

曰志大謂狂略於事謂簡如曾點異乎三子者之撰則志大而略於事可知直欲躡乎聖人之樂處則其望高遠可知終不肯做下學工夫後至於臨人之喪而歌不能改其舊可知狂簡二字又該括得下兩句進取即是志大不忘其初即是略於事也

孟子曰孔子不得中道而與之必也狂獯乎狂者進取  
獯者有所不為也孔子豈不欲中道哉不可必得故思

其次也

獯音  
絹

不得中道至有所不為據論語亦孔子之言然則孔

子字下當有曰字論語道作行獯作狷有所不為者

知恥自好

去聲

不為不善之人也孔子豈不欲中道以

下孟子言也

其次謂  
狂者

敢問何如斯可謂狂矣

萬章問

曰如琴張曾皙牧皮者孔子之所謂狂矣

琴張名牢字子張子桑戶死琴張臨其喪而歌事見

形句反

莊子

莊子大宗師篇子桑戶死孟子反子琴張相與為友子桑戶死未葬孔子聞之使

下同

子貢往行事焉或編曲或鼓琴相和而歌曰嗟來桑戶乎而已反其真而我猶為人猗於宜反子貢趨而

進曰敢問臨喪而歌禮乎二人相視而笑曰是惡音焉知禮義雖未必盡然要必有

近似者曾皙見前篇季武子死曾皙倚其門而歌事

見檀弓

記檀弓下季武子寢疾及其喪也曾點倚門而歌

又言志異乎三子

者之撰事見論語妝皮未詳

何以謂之狂也

萬章問

曰其志嚶嚶然曰古之人古之人夷考其行而不掩焉

者也

嚶火交反  
行去聲

嚶嚶志大言大也重

平聲

言古之人見其動輒稱之不

一稱而已也夷平也掩覆

數救反

也言平考其行則不

能覆其言也

新安陳氏曰志大言大動欲慕古狂程  
故也平考其行行不掩言簡故也

子曰曾皙言志而夫子與之蓋與聖人之志同便是

堯舜氣象也特行有不掩焉耳此所謂狂也

慶源輔氏曰曾

皙之志固不止於如此然其不屑之於事為其直欲徑探乎聖人之樂處則與所謂嘒嘒然曰古之人古之人之意亦不相遠而其行有不能掩其言者則又自有不可誣也故集註取程子之說以釋之夫子與之者是與其志大言大也便是堯舜氣象者是亦所謂古之人古之人之類也

狂者又不可得欲得不屑不潔之士而與之是獯也是又其次也

此因上文所引遂解所以思得獯者之意狂有志者

也。獮有守者也有志者能進於道有守者不失其身

屑潔也

朱子曰狂者知之過獮者行之過○南軒張氏曰中庸云智者過之其狂者歟賢者過之

其獮者歟鄉原即所謂小人之中庸也○慶源輔氏曰狂者是合下氣質高明使自有所見者獮者是合下氣質全固使自有所守者狂者則於知上所得分數多獮者則於行上所得分數多聖門學者必皆中與和合德知與行並進然後為貴所謂中道者是也此等人既不可得故不得已而與夫狂獮也○新安陳氏曰以不善為不潔而不屑為之也

孔子曰過我門而不入我室我不憾焉者其惟鄉原乎

鄉原德之賊也曰何如斯可謂之鄉原矣

鄉原非有識者原與愿同荀子原慤

克角反

字皆讀作

愿謂謹愿之人也

荀子榮辱篇孝悌原慤以敦比其事業○富國篇其臣主百吏汙者

皆化而脩悍者先化而原躁者先化而慤是明主之功已○正論篇上端誠則下原慤矣上公正則下易

直故鄉里所謂愿人謂之鄉原孔子以其似德而非

德故以為德之賊過門不入而不恨之以其不見親

就為幸深惡

去聲

而痛絕之也

以上釋孔子語

萬章又引孔子

之言而問也

慶源輔氏曰先儒皆以原為善不惟無所據又既謂之善人則不應遂以為德

之賊故集註引荀子為證以原為愿且曰鄉人無知其所謂愿人謂之鄉原原字固淺狹又鄉人以為愿

則亦非真  
愿者也

曰何以是嘐嘐也言不顧行行不顧言則曰古之人古  
之人行何為蹢蹢涼涼生斯世也為斯世也善斯可矣

闔然媚於世也者是鄉原也

行去聲蹢其  
禹反闔音奄

蹢蹢獨行不進之貌涼涼薄也不見親厚於人也鄉

原譏狂者曰何用如此嘐嘐然行不掩其言而徒每

事必稱古人邪

俗作耶

又譏狃者曰何必如此蹢蹢涼

涼無所親厚哉人既生於此世則但當為此世之人



使當世之人皆以為善則可矣此鄉原之志也

以上皆釋

鄉原之言

閹如奄人之奄閉藏之意也

周禮春官守桃奄八人遠廟曰桃奄

如今之宦者

媚求悅於人也孟子言此深自閉藏以

求親媚於世是鄉原之行

去聲也

朱子曰鄉原務為謹

專務徇俗欲使人無所非刺既不肯做狂又不肯做獨一心只要得人說好更不理會自己所見所得與夫理之是非彼狂者嘒嘒然以古人為志雖行之未至而所知亦甚遠矣獨者便只是有志力行不為不善二者皆能不顧流俗汙世之是非雖是不得中道却都自是為己不為他人鄉原反非笑之鄉原者為他做得好使人皆稱之而不知其有無窮之禍如五代馮道者此真鄉原也○慶源輔氏曰閹然媚於世

此是鄉原之隱情匿  
志孟子說破其情狀

萬章曰一鄉皆稱原人焉無所往而不為原人孔子以  
為德之賊何哉

原亦謹厚之稱而孔子以為德之賊故萬章疑之  
曰非之無舉也刺之無刺也同乎流俗合乎汙世居之  
似忠信行之似廉潔衆皆悅之自以為是而不可與入  
堯舜之道故曰德之賊也

呂侍講曰言此等之人欲非之則無可舉欲刺之則

無可刺也流俗者風俗頹

徒回反

靡如水之下流衆莫

不然也汙濁也非忠信而似忠信非廉潔而似廉潔

朱子曰狂者所見過於高遠而行不到狷者能力行而見有所不逮二者皆可收拾入來至於鄉原則孟子敢斷然以為德之賊者蓋其居之似忠信行之似廉潔衆皆悅之使其回頭來却未可知只被他自以為是既把來做了便休是以終身為原人而孟子以為德之賊也○南軒張氏曰此數句極鄉原之情狀非之無舉刺之無刺言其善自矯飾流俗能同汙世能合言其無所執守也以忠信廉潔曰似則非真矣衆皆悅之則異乎鄉人之善者好之矣自以為是所以卒為鄉原而不可反也堯舜之道大中至正天理之存乎人心者也此所謂善也若鄉原所謂善斯可矣則出於一己之私竊善之似而已異端之於正

道如黑與白本不足以賊德惟道之不明世俗之見易以惑溺故以為德之賊也○慶源輔氏曰鄉原既欲人以為謹愿故同乎流俗而不敢自異合乎汙世而不能自拔故眾皆悅之自以為是則又迷而不知反故不可與入堯舜大

中至正真實之道也

孔子曰惡似而非者惡莠恐其亂苗也惡佞恐其亂義也惡利口恐其亂信也惡鄭聲恐其亂樂也惡紫恐其亂朱也惡鄉原恐其亂德也

惡去聲  
莠音有

孟子又引孔子之言以明之莠似苗之草也佞才智之稱其言似義而非義也利口多言而不實者也鄭

聲淫樂也樂正樂也紫間

去聲

色朱正色也鄉原不狂

不獯人皆以為善有似乎中道而實非也故恐其亂

德

慶源輔氏曰佞者有口才能辨說故以為才智之稱惟其能言則其說多似義而實不然故以為害

義巧言之人徒尚口而初無誠實故以為害信鄉原既譏狂者故不狂又譏獯者故不獯衆皆悅之故人皆以為善而不可與入堯舜之道故有似乎中道而實非此聖人所以恐其亂德而深惡之據論語所載亦與此不同雖有詳略然其惡似而非之意則一也

君子反經而已矣經正則庶民興庶民興斯無邪慝矣

反復也經常也萬世不易之常道也

經只是日用常行道理

興

興起於善也邪慝如鄉原之屬是也

新安陳氏曰邪慝不止是鄉原

如楊墨皆是以此章言則指鄉原故云鄉原之屬

世衰道微大經不正故人

人得為異說以濟其私而邪慝並起不可勝

平聲

正君

子於此亦復其常道而已常道既復則民興於善而

是非明白無所回互雖有邪慝不足以惑之矣○尹

氏曰君子取夫

扶音

狂狷者蓋以狂者志大而可與進

道狷者有所不為而可與有為也所惡

去聲

於鄉原而

欲痛絕之者為

去聲

其似是而非惑人之深也絕之之

術無他焉亦曰反經而已矣

問反經之說朱子曰經便是大經君臣父子夫

婦兄弟朋友且先復此大經天下事未有出此五者其間却殺有曲折如大學亦先指此五者為言使大綱既正則其他節目皆可舉若不先此大綱則其他細碎工夫如何做○問經正還只是躬行不及政事曰這箇不通分做兩件說如堯舜雖是端拱無為只政事便就這裏做出那曾恁地便了○孟子論鄉原亂德之害而卒以君子反經為說此所謂上策莫如自治者況異端邪說日新月益其出無窮蓋有不可勝排者惟吾學既明則彼自滅熄耳此學者所當勉而不可以外求者也○經正則庶民興蓋風化之行在上之人舉而措之而已庶民興則人人知反其本而見善明見善明則邪慝不能惑也既人不之惑則其道自然銷鑠而至於無也歐陽永叔云使王政明而禮義充雖有佛無所施於吾民矣亦此意也○慶

源輔氏曰集註反經之說實辨異端息邪說之大權也○雲峯胡氏曰此章言經正而下章則以聖人相傳之說繼之不無意也

○孟子曰由堯舜至於湯五百有餘歲若禹臯陶則見而知之若湯則聞而知之

趙氏曰五百歲而聖人出天道之常然亦有遲速不能正五百年故言有餘也尹氏曰知謂知其道也

慶源

輔氏曰天道固有常矣然亦不能截然整齊須有先後遲速○雲峯胡氏曰語孟末皆言堯舜以來相傳之意但論語以行言故歷述其政事之實孟子以知言故歷叙其見聞之真堯言執中中之用也湯言降



衷中之體也舜自心上發出執中之蘊而六經言心  
始此湯自性上推原降衷之初而六經言性始此此  
可見堯舜湯明道處至若見而知之言禹臯而不言  
稷契何也或曰舉禹臯可例其餘然考之書稷契不  
曰謨而禹臯獨曰謨蓋可見也況洪範九疇禹發之  
天叙天秩五典五禮臯發之其明道之功固不小也  
由湯至於文王五百有餘歲若伊尹萊朱則見而知之  
若文王則聞而知之

趙氏曰萊朱湯賢臣或曰即仲虺

許偉反

也為湯左相

去聲○雲峯胡氏曰舜言精一而後協于克一伊尹  
能發之堯言執中而後建中于民仲虺能發之曰勇  
曰智曰仁曰禮曰義中庸三達德孟子四端已散見  
於仲虺語中矣吾以是知萊朱即仲虺也○論語之

未言武不言文此言文不言武文王謨以明道言也  
武王烈以行道言也易之作也其於中古乎文王明  
道之功大矣○新安陳氏曰萊朱與伊尹並稱而經  
傳不他見仲虺作語弘大精微仁義禮智信皆開端  
言之而德曰新一言又首唱之湯盤銘伊尹咸有一  
德皆因而述之伊尹相湯虺為左相同時他誰與之  
班者萊朱即仲虺也必矣

由文王至於孔子五百有餘歲若太公望散宜生則見  
而知之若孔子則聞而知之

散素  
童反

散氏宜生名文王賢臣也子貢曰文武之道未墜於  
地在人賢者識其大者不賢者識其小者莫不有文

武之道焉夫子焉不學此所謂聞而知之也

或曰尚父鷹揚

之士也散宜生於經傳不多見亦以為見文王之道而知之者何也雲峯胡氏曰敬勝怠義勝欲之類非太公孰發之書曰茲迪彝教則彝倫之教散宜生蓋有助焉

由孔子而來至於今百有餘歲去聖人之世若此其未遠也近聖人之居若此其甚也然而無有乎爾則亦無有乎爾

林氏曰孟子言孔子至今時未遠鄒魯相去又近然而已無有見而知之者矣則五百餘歲之後又豈復

扶又反  
下同

有聞而知之者乎

朱子曰由堯舜至孔子率  
五百餘歲而聖人一出所

以異世同心歷聖同道道統繩繩相續不絕者實賴  
同時之見而知之者知之於先而異世之聞而知之  
者得以知之於後耳自孔子至今方百餘歲去孔子  
之時若此其未遠也孟子鄒人近孔子所居之魯又  
若此其甚也若使今此已無有見而知之者則如前  
所云五百歲之後豈復有聞而知之者乎○禹皋之  
徒本皆名世之士伊尹太公又湯文之師非必見其  
君而後知之湯文孔子又生知之聖亦非必聞前聖  
之道而後得之也此其曰見而知之聞而知之者蓋  
以同時言之則斯道之統臣當以君為主以異世言  
之則斯道之傳後聖當以前聖為師學者不以辭害  
意可也至於章末二句則孟子之致意深矣觀其所  
謂然而無有乎爾則雖若託於不居而其自任之實  
可見觀其所謂則亦無有乎爾則雖若歎其將絕而

所以啓夫萬世無窮之傳者又未嘗不在於斯也學者誠能深考其言而自得之則古人雖遠而其志意之所存者蓋無以異乎日相與言而授受於一堂之上也○雲峯胡氏曰論先後則不有見之者而孰有聞之者是則見而知之者為先論難易則見而知之者聚精會神於一時之頃而聞而知之者心融神會於異世之遙是則聞而知之者為難也

愚按此言雖若不敢自謂已得

其傳而憂後世遂失其傳然乃所以自見其有不得

辭者而又以見夫

音扶下同

天理民彝不可泯滅百世之

下必將有神會而心得之者耳故於篇終歷序群聖

之統而終之以此所以明其傳之有在

新安陳氏曰此中言然而

無有乎爾之意孟子隱然謂道統之傳在己而以其辭婉其意深非詳玩味之不能見耳而又以

俟後聖於無窮也

新安陳氏曰申言則亦無有乎爾之意以望後世聖賢之能傳道統

者此已為程子接孟子之絕學者張本矣

其旨深哉

雲峯胡氏曰集註神會心得四字有深意

蓋為聞而知之者言也孟子所謂見而知聞而知者知其道也知其道者知其心也時有先後之異心無先後之間萬古一理千聖一心世遠而心之神明相接迹異而心之天理相孚默而成之不言而信此其為神會而心得之者歟

○有宋元豐八年河南程顥伯淳卒潞

公文彥博題其墓曰明道先生而其弟頤正叔序之

曰周公沒聖人之道不行孟軻死聖人之學不傳道

不行百世無善治

去聲

學不傳千載

音宰

無真儒無善治

士猶得以明夫善治之道以淑諸人以傳諸後無真

儒則天下質質

音茂

焉莫知所之人欲肆而天理滅矣

雲峯胡氏曰論語之末堯而後終之以武王孟子之末終之以孔孟道不行百世無善治武王以後事學

不傳千載無真儒孔孟以後事無善治而下先生生又言道之不明其害有甚於道之不行者也

乎千四百年之後

新安陳氏曰孟子沒至明道生大約年數如此

得不傳之

學於遺經以興起斯文為己任辨異端闢邪說使聖

人之道煥然復明於世蓋自孟子之後一人而已

雲峯

胡氏曰朱子贊濂溪先生之言曰道喪千載聖遠言湮不有先覺孰聞我人今言明道而不言濂溪者二程夫子受學於濂溪先生見而知之者也且孟子所述列聖之相傳者非徒為其行道而言實為其聞知見知有以明斯道而言也伊川墓述專言學不傳則道不明之害而又深言夫明道之功正與孟子之意相合故集然學者於道不知所向則孰知斯人之為

功不知所至則孰知斯名

明道二字

之稱情意哉

稱去聲情實也

名稱其實也○慶源輔氏曰集註係以程子之說者見程子果得其傳於遺經而孟子之說至是而遂驗也○雲峯胡氏曰所向者人道之始事所至者造道之極功學者不知所向則非有志於斯道者不足以知明道不知所至則非深造乎斯道者亦不能真知明道也趨向之正造詣之深庶乎可知明道之所以



為明道矣真知明道則真知堯舜以至於孔孟者矣  
善乎勉齋黃氏之言曰由孔子而後曾子子思繼其  
微至孟子而始著由孟子而後周程張子繼其絕至  
朱子而始著朱子出而自周以來聖賢相傳之道一  
旦豁然如大明中天昭晰呈露然則集註所謂百世  
而下必有神會而心得之者朱子亦當自見其有不  
得解者矣○新安陳氏曰朱子繫以伊川此說者見  
得孟子之意望百世之下將有神會心得其道者而  
得之百年後果有如程子者出焉見孟子之言至是  
而果驗孟子不傳之絕學至是而果有傳也觀韓子  
所謂堯桮是傳之舜至軻之死不得其傳焉之言見  
道統之傳至孟子而絕察朱子所列明道墓表之意  
見道統之傳既絕而後續也  
孟子朱子之意章章明矣

孟子集註大全卷十四